

Hyrje për këtë edicion

Informacion i përgjithshëm

Bordi i Standardeve Ndërkombëtare të Kontabilitetit (BSNK), me qendër në Londër, filloi aktivitetin e vet në vitin 2001. BSNK është e angazhuar të zhvillojë, në interes të publikut, një paketë të vetme standardesh botërore kontabiliteti të cilësisë së lartë të cilat kërkojnë dhënien e një informacioni transparent dhe të krahasueshëm në pasqyrat financiare të përgjithshme. Në ndjekje të këtij objekti, BSNK bashkëpunon me organet kombëtare të vendosjes së standardeve të kontabilitetit, për të arritur konvergencën për sa u takon standarteve të kontabilitetit në mbarë botën. Anëtarët e BSNK-së vijnë nga një gamë e gjerë përvojash profesionale dhe kanë përgjegjësinë për të qëndruar në lidhje me mbarë botën. BSNK zgjidhet, mbikëqyret dhe financohet nga Fondacioni i Komitetit të Standardeve Ndërkombëtare të Kontabilitetit (KSNK). Mbështetja financiare vjen nga firmat e mëdha të kontabilitetit, institucionet financiare private dhe kompanitë industriale nga e gjithë bota, nga bankat qendrore dhe ato për zhvillim dhe nga organizata të tjera ndërkombëtare dhe profesionale.

Administratorët e Besuar

Kontrollin mbikëqyrës të operacioneve të Fondacionit të KSNK-së dhe të BSNK-së e sigurojnë njëzetedy Administratorë të Besuar. Në përgjegjësitë e Administratorëve të Besuar përfshihet emërimi i anëtarëve të BSNK-së, të Bordit Këshillimor për Standardet dhe të Komitetit të Interpretimeve për Raportimin Financiar Ndërkombëtar; monitorimi i efektivitetit të BSNK-së dhe i respektimit të procesit të rregullt dhe procedurave të konsultimeve; vendosja dhe ruajtja e masave të duhura të financimit; aprovimi i buxhetit për Fondacionin e KSNK-së; dhe përgjegjësia për ndryshimet kushtetuese.

Administratorët e Besuar janë persona të cilët, si grup, sigurojnë drejtpeshimin e duhur të përvojave profesionale, ku përfshihen auditues, përpilues, përdorues, akademikë dhe zyrtarë të tjerë të cilët i shërbejnë interesit publik. Sipas Statutit të Fondacionit të KSNK-së, të ndryshuar në 2005 (shih më poshtë), Administratorët e Besuar caktohen në mënyrë të atillë që të ketë gjashtë nga rajoni i Azisë dhe Oqeanisë, gjashtë nga Evropa, gjashtë nga Amerika e Veriut dhe katër të tjerë nga cilado prej këtyre trevave, për sa kohë që ruhet një drejtpeshim gjeografik.

Rishikimi i Statutit të Fondacionit të KSNK-së

Administratorët e Besuar përfunduan një rishikim dhe ndryshim të Statutit të Fondacionit të KSNK-së në qershor 2005. Raporti i Administratorëve të Besuar, me titullin *Ndryshimet në Statutin e FKSJK-së*, ku diskutohen rezultatet e rishikimit, është publikuar në korrik 2005 dhe mund të shikohet në hapësirën në internet me adresë www.iasb.org. Statuti i ndryshuar hyri në fuqi më 1 korrik 2005.

BSNK

BSNK përbëhet nga katërmëdhjetë anëtarë (dymbëdhjetë me kohë të plotë dhe dy me kohë të pjesshme) dhe ka të drejtën e plotë për marrjen e vendimeve për përpilimin dhe ndjekjen e programit teknik për vendosjen e standardeve të kontabilitetit. Kushtet kryesore për t'u anëtarësuar në BSNK janë aftësia profesionale dhe përvoja praktike. Administratorëve të Besuar u kërkohet të përzgjedhin anëtarë të tillë në mënyrë që BSNK, si grup, të konsistojë në gërshetimin më të mirë të njohurive teknike dhe përvojës në biznesin dhe tregun ndërkombëtar dhe të kujdesen që BSNK të mos dominohet nga asnjë organizatë e veçantë apo interes gjeografik. BSNK pritet edhe të ofrojë ndërthurjen më të mirë të përvojës më të fundit praktike të audituesve, hartuesve, përdoruesve dhe akademikëve. Në konsultim me Administratorët e Besuar, BSNK pritet të vendosë dhe ruajë lidhjet me organet kombëtare të vendosjes së standardeve dhe me organe të tjera zyrtare që kanë të bëjnë me vendosjen e standardeve në mënyrë që të nxitet konvergjenca e standardeve kombëtare me Standardet Ndërkombëtare të Raportimit Financiar (SNRF) të BSNK-së. Publikimi i një standardi, projekt-paraqitjeje apo interpretimi përfundimtar të KIRFN-së kërkon aprovimin prej nëntë nga katërmëdhjetë anëtarët e BSNK-së. Më 1 janar 2007, anëtarët e BSNK-së ishin:

Z. David Tweedie, *Kryetar*

Thomas E Jones, *Nën-Kryetar*

Prof. Mary Barth (*me kohë të pjesshme*)

Hans-Georg Bruns

Anthony T Cope

Philippe Danjou

Jan Engström

Robert P Garnett

Gilbert Gélard

James J Leisenring

Warren J McGregor

Patricia L O'Malley

John T Smith (*me kohë të pjesshme*)

Tatsumi Yamada

BNSK nxjerr një përmbledhje të vendimeve të veta menjëherë pas çdo takimi të BSNK-së. Organi *IASB Update* publikohet në formatin elektronik në hapësirën në internet të BSNK-së www.iasb.org.

Bordi Këshillimor për Standardet

Bordi Këshillimor për Standardet (BKS) ofron një forum ku mund të marrin pjesë ato organizata dhe persona të cilët kanë interes për raportimin financiar ndërkombëtar dhe të cilët vijnë nga sfonte të ndryshme gjeografike dhe funksionale. Objektivi i BKS-së është të kështillojë BSNK-në për vendimet e marra në lidhje me programin dhe prioritetet e punës, të informojë BSNK-në për mendimet e anëtarëve të BKS-së në lidhje me projektet e mëdha të vendosjes së standardeve dhe t'u japë këshillë BSNK-së dhe Administratorëve të Besuar.

BKS përbëhet nga dyzetë anëtarë. Zakonisht, BKS-ja takohet të paktën tri herë në vit. Takimet e tij janë të hapur për publikun. Kryetarin e BKS-së e emërojnë Administratorët e Besuar dhe ai nuk mund të jetë anëtar apo punonjës i BSNK-së. Kryetari i BKS-së mund të marrë pjesë në takimet e Administratorëve të Besuar, me anë të një ftese.

Të dhënat për anëtarët e BKS-së mund të shikohen në hapësirën në internet www.iasb.org.

Komiteti Ndërkombëtar i Interpretimeve për Raportimin Financiar

Komiteti Ndërkombëtar i Interpretimeve për Raportimin Financiar emërohet nga Administratorët e Besuar, për të ndihmuar BSNK-në për vendosjen dhe përmirësimin e standardeve të kontabilitetit dhe raportimit financiar në të mirë të përdoruesve, hartuesve dhe audituesve të pasqyrave financiare. Administratorët e Besuar e krijuan KIRFN-në në mars 2002, kohë në të cilën zëvendësoi komitetin e mëparshëm të interpretimeve, të quajtur Komiteti i Përhershëm i Interpretimeve (KIS). Roli i KIRFN-së është të japë orientim në kohën e duhur për çështjet e identifikuar rishtazi të raportimit financiar të cilat nuk trajtohen në mënyrë specifike nga SNRF-të apo për ato çështje për të cilat janë bërë apo duket se ka të ngjarë të bëhen interpretime jo të kënaqshme apo që bien ndesh me njëri tjetrin. Kështu, ai nxit një aplikim rigoroz dhe të njëtrajtshëm të SNRF-ve.

KIRFN e ndihmon BSNK-në për arritjen e konvergjencës ndërkombëtare të standardeve të kontabilitetit duke punuar me grupe të ngjashme të mbështetur nga organet kombëtare të vendosjes së standardeve për të arritur konkluzione të ngjashme për ato çështje të cilat bazohen në standarde që, në thelb, janë të ngjashëm.

KIRFN ka dymbëdhjetë anëtarë me të drejtë vote, krahas një kryetari pa të drejtë vote, i cili, tani, është anëtar i BSNK-së Robert Garnett. Kryetari ka të drejtë të flasë për çështjet teknike të cilat po diskutohen, por nuk ka të drejtën e votimit. Administratorët e Besuar, kur e konsiderojnë të nevojshme, mund të emërojnë si vëzhgues pa të drejtë vote organizata rregullatore, përfaqësuesit e të cilave kanë të drejtën të marrin pjesë dhe të flasin në takime. Hë për hë, vëzhgues pa të drejtë vote janë Organizata Ndërkombëtare e Komisioneve të Letrave me Vlerë (IOSCO) dhe Komisioni Evropian.

KIRFN publikon një përmbledhje të vendimeve të veta menjëherë pas çdo takimi. Organi *IFRIC Update* publikohet në formatin elektronik në hapësirën në internet të BSNK-së.

Të dhënat për anëtarët e KIRFN-së mund të shikohen në hapësirën në internet www.iasb.org.

Personeli i BSNK-së

BSNK-në e mbështet një personel me qendër në Londër, i drejtuar nga Kryetari i BSNK-së. Më 1 janar 2007 personeli teknik përfshinte persona nga Australia, Kina, Franca, Gjermania, Irlanda, Japonia, Koreja, Malajzia, Meksika, Zelanda e Re, Nikaragua, Polonia, Afrika e Jugut, Mbretëria e Bashkuar dhe Shtetet e Bashkuara të Amerikës.

Procesi i rregullt

Procesi i rregullt i BSNK-së

SNRF-të përgatiten përmes një sistemi formal të procesit të rregullt dhe konsultimeve të gjera ndërkombëtare.

BSNK ka përgjegjësinë e plotë për të gjitha çështjet teknike të BSNK-së, përfshirë përgatitjen dhe publikimin e SNRF-ve dhe të projekt-paraqitjeve dhe për aprovimin përfundimtar të interpretimeve të përpiluara nga KIRFN. BSNK ka të drejtën e plotë të marrjes së vendimeve për përpilimin dhe ndjekjen e programit të vet teknik. Zakonisht, procesi formal i rregullt për projektet ka të bëjë me ndjekjen e këtyre hapave (hapat që kërkohen sipas rregullave të Statutit të Fondacionit të KSNK-së janë shënuar me yll *):

- (a) Stafit të BSNK-së i kërkohet të identifikojë, shqyrtojë dhe ngrejë çështje të cilat mund të kërkojnë vëmendjen e Bordit. Diskutimi i BSNK-së për projektet e mundshme dhe vendimet për miratimin e projekteve të reja bëhet në mbledhje publike të Bordit. Përpara se të arrijë vendime të tilla, BSNK konsultohet me BKS për pikat e propozuara të programit dhe për vendosjen e prioriteteve.*
- (b) Kur shton një pikë në programin e vet aktiv, BSNK vendos nëse ta zbatojë vetëm një projekt, apo në mënyrë të përbashkët me një organ tjetër të vendosjes së standardeve.
- (c) Pasi merr në shqyrtim natyrën e çështjeve dhe nivelin e interesit të organizatave anëtare, BSNK mund të krijojë një grup pune.
- (d) Edhe pse materiali për diskutim nuk është një hap i detyrueshëm i procesit të rregullt, zakonisht BSNK publikon një material për diskutim si publikim të parë për një temë kryesore të re. Më shpesh, materiali për diskutim përfshin një informacion të përgjithshëm të plotë për çështjen, qasjet e mundshme për zgjidhjen e çështjes, pikëpamjet paraprake të autorëve të materialit apo të BSNK-së dhe një ftesë për dhënien e komenteve. Nëse BSNK vendos të mos e ndjekë këtë hap, ai paraqet arsyet e veta.
- (e) Publikimi i një projekt-paraqitjeje është një hap i detyrueshëm i procesit të rregullt.* Përgatitja e projekt-paraqitjes kryhet gjatë mbledhjeve të BSNK-së, të zhvilluara publikisht. Kjo kërkon që BSNK të marrë në shqyrtim dhe të arrijë vendime për çështjet në bazë të studimeve dhe rekomandimeve të stafit, si edhe të komenteve të marra për materialet për diskutim, sugjerimet e bëra nga BKS-ja, grupet e punës dhe organet kombëtare të vendosjes së standardeve si edhe ato që dalin nga seancat e edukimit të publikut të zhvilluara nga BSNK. Një projekt paraqitje duhet të aprovohet nga të paktën nëntë anëtarë të BSNK-së.* Një projekt paraqitje shoqërohet nga një bazë për konkluzione dhe përfshin edhe pikëpamjet alternative të atyre anëtarëve të BSNK-së që nuk janë dakort me të.
- (f) BSNK shqyrton letrat me komente që ka marrë* dhe rezultatet e konsultimeve të tjera. Për të eksploruar më tej çështjet dhe për të marrë komente dhe sugjerime të tjera, BSNK mund të kryejë vizita në bazë ose të organizojë seanca dëgjimore për publikun dhe tryeza të rrumbullakëta.
- (g) Përgatitja e një SNRF-je bëhet gjatë mbledhjeve të BSNK-së, të zhvilluara publikisht. Pas zgjidhjes së problemeve që dalin nga projekt-paraqitja, BSNK shqyrton nëse duhet apo jo të publikojë për komente ndonjë propozim të rishikuar. Kur BSNK mendon se ka arritur në një konkluzion për çështjet që kanë dalë nga projekt-paraqitja, i jep udhëzime stafit të përpilojë SNRF-në. Një SNRF duhet të aprovohet nga të paktën nëntë anëtarë të BSNK-së.* Një SNRF shoqërohet nga një bazë për konkluzione dhe përfshin edhe opinionet kundërshtuese të atyre anëtarëve të BSNK-së që kanë votuar kundër standardit.

Në bazë të një qasjeje “zbato ose shpjegohu”, që përdoret nga organe të ndryshme rregullatore, BSNK shpjegon arsyet e veta nëse vendos të anashkalojë ndonjërin prej hapave që nuk janë të detyrueshëm, në procesin e vet konsultues.

Pas një shqyrtimi të procedurave të veta konsultuese, BSNK ka bërë ndryshime në procesin e rregullt. Këto ndryshime u paraqitën në një dokument për konsultim për të cilin Administratorët e Besuar i bënë thirrje publikut të japë komente në vitin 2005. Administratorët e Besuar, më pas, miratuan procedurat, të cilat janë përfshirë në *Manualin e procesit të rregullt për BSNK-në*.

Procesi i rregullt i KIRFN-së

Interpretimet e SNRF-ve përgatiten përmes një sistemi zyrtar të procesit të rregullt dhe konsultimeve të gjera ndërkombëtare. KIRFN i diskuton çështjet teknike në takime të cilat janë të hapura për t'i ndjekur publiku. Zakonisht, procesi i rregullt për çdo çështje ka të bëjë me ndjekjen e këtyre hapave (hapat që kërkohen sipas rregullave të Statutit të Fondacionit të KSNK-së janë shënuar me yll *):

- (a) KIRFN i analizon çështjet e sugjeruara nga organet anëtare për t'i futur në programin e KIRFN. Kur KIRFN vendos të mos merret me një çështje, bën publike arsyen e këtij vendimi. Vendimi paraprak për programin së bashku me arsyet publikohet në formë jo përfundimtare menjëherë pas takimit të KIRFN-së në të cilin janë

paraqitur. Kjo i jep kohë publikut të japë komentet e veta përpara se të merret në shqyrtim në mbledhjen e radhës të KIRFN-së rekomandimi për të mos u marrë me një çështje.

- (b) Për ato çështje të futura në programin e punës, stafi i BSNK-së përgatit një përmbledhje. Në të përshkruhet çështja dhe jepet informacioni i nevojshëm për anëtarët e KIRFN për ta kuptuar çështjen dhe për të marrë vendim për të. Përgatitja e një përmbledhjeje të çështjes përfshin një shqyrtim të literaturës kompetente të kontabilitetit përfshirë edhe *Kuadrin* e BSNK-së, shqyrtimin e alternativave dhe konsultimin me organet kombëtare të vendosjes së standardeve, përfshirë edhe komitetet kombëtare që kanë përgjegjësinë e interpretimit të standardeve kombëtare.
- (c) Arrihet një konsensus për një projekt-interpretim nëse kundër propozimit kanë votuar kundër jo më shumë se tre anëtarë të KIRFN-së.* Projekt-interpretimi bëhet publik për komente nga publiku nëse nuk kanë kundërshtim pesë ose më shumë anëtarë të BSNK-së, për bërjen publike, brenda një jave pasi informohen për përfundimin e tij.*
- (d) Komentet e marra gjatë periudhës së komenteve merren në shqyrtim nga KIRFN përpara se të përmbyllet një interpretim.*
- (e) Arrihet një konsensus për një interpretim nëse jo më shumë se tre anëtarë të KIRFN-së kanë votuar kundër propozimit.* Interpretimi i kalohet BSNK-së për miratim. Miratimi nga BSNK kërkon votimin pro nga të paktën nëntë anëtarë të BSNK-së.* Interpretimet e aprovuara publikohen nga BSNK.

Me nismën e vet, por me mbështetjen e Administratorëve të Besuar, KIRFN ka bërë një shqyrtim të brendshëm të operacioneve të veta. Në mars 2005, Fondacioni i KSNK-së nxori për komente publike një material për konsultim me titull *Shqyrtimi i operacioneve nga KIRFN*. Në dritën e diskutimeve për komentet e marra, KIRFN hartoi një projekt-manual të procesit të rregullt. Pas shqyrtimit të komenteve, u rishikua projekt-manuali. Manuali i procesit të rregullt për KIRFN-në u publikua nga Administratorët e Besuar në formë paraprake për komente nga publiku. Periudha e komenteve u mbyll më 30 shtator 2006. Administratorët e Besuar e aprovuan *Manualin e procesit të rregullt për KIRFN-në* në janar 2007.

Votimi

Publikimi i një standardi, projekt-paraqitjeje apo interpretimi përfundimtar kërkon aprovimin prej nëntë nga katërmbëdhjetë anëtarët e BSNK-së. Vendimet e tjera të BSNK-së, përfshirë edhe publikimin e një materiali për diskutim, kërkon shumicë të thjeshtë të anëtarëve të BSNK-së të pranishëm në një takim në të cilin marrin pjesë të paktën 60 përqind të anëtarëve të BSNK-së, personalisht ose përmes mjeteve të telekomunikimit.

Secili anëtar me të drejtë vote i KIRFN-së ka një votë. Nëntë anëtarë me të drejtë vote të KIRFN-së përbëjnë një kuorum. Anëtarët votojnë sipas pikëpamjeve të tyre të pavarura, jo si përfaqësues të pikëpamjeve të firmave, organizatave apo organeve anëtare, në të cilat mund të bëjnë pjesë. Miratimi i versioneve paraprake apo përfundimtare të interpretimeve kërkon që kundër vendimit të mos votojnë më shumë se tre anëtarë me të drejtë vote.

Takimet e hapura

Takimet e Administratorëve të Besuar, BSNK-së, BKS-së dhe KIRFN-së janë të gjithë të hapur për t'u vëzhguar nga publiku. Megjithatë, disa diskutime të caktuara (normalisht, për përzgjedhjen, emërimin dhe çështje të tjera të personelit) mbahen të mbyllura.

BSNK vijon të eksplorojë se si mund të përdoret teknologjia për të kapërcyer pengesat gjeografike dhe problemet e tjera logjistike dhe për të mundësuar, kështu, ndjekjen e mbledhjeve të hapura nga publiku. Një shembull i këtyre novacioneve të fundit është edhe përdorimi i transmetimeve me audio dhe video në internet.

Rendi i ditës i secilit takim të personave të Besuar, BSNK-së, BKS-së dhe KIRFN-së publikohet paraprakisht në hapësirën në internet të BSNK-së, së bashku me shënimet përkatëse, në të cilat jepet thelbi i dokumenteve të përgatitura për takimin. BSNK publikon menjëherë edhe një përmbledhje të vendimeve teknike të marra në takimet e BSNK-së dhe të KIRFN-së dhe, kur duhet, edhe të vendimeve të Administratorëve të Besuar.

Kur BSNK nxjerr një standard ose një interpretim, ai publikon Bazën për Konkluzione ku shpjegon logjikën mbi të cilën mbështeten konkluzionet dhe ku jepet informacioni historik i cili mund t'i ndihmojë përdoruesit e SNRF-ve t'i zbatojnë ato në praktikë. BSNK publikon edhe opinionet kundërshtuese që kanë anëtarët për standardet.

Periudhat e komenteve

Për të marrë komente nga publiku, BSNK publikon materiale për diskutim dhe çdo projekt-paraqitje të një standardi, ku periudha normale e komenteve është 120 ditë. Në kushte të caktuara, BSNK mund t'i mbajë për diskutim propozimet për një periudhë më të gjatë ose më të shkurtër. Projekt-interpretimet e KIRFN-së, normalisht, qëndrojnë për diskutim për një

periudhë 6-ditore komentesh, edhe pse në kushte të caktuara mund të përdoret një periudhë më e shkurtër, por që nuk mund të jetë më pak se 30 ditë.

Bashkërendimi me proceset e rregullta kombëtare

BSNK takohet çdo vit me organet kombëtare të vendosjes së standardeve ose me organizma të tjera zyrtare që kanë të bëjnë me vendosjen e standardeve të kontabilitetit. Krahas kësaj, anëtarët e stafit të BSNK-së dhe të organeve të vendosjes së standardeve të kontabilitetit bashkëpunojnë përditë për projekte të ndryshme, duke vendosur burimet në dispozicion të njëri tjetrit kur duhet. Bashkërendimi i ngushtë midis procesit të rregullt të BSNK-së dhe procesit të rregullt të organeve të vendosjes së standardeve të kontabilitetit është i rëndësishëm për suksesin e BSNK-së. Po kështu, anëtarët e BSNK-së janë në kontakt të rregullt me organet kombëtare të vendosjes së standardeve.

Mundësitë për të dhënë kontribut

Përgatitja e një Standardi Ndërkombëtar të Raportimit Financiar (SNRF) përfshin një proces të hapur publik, ku debatohen çështjet teknike dhe vlerësohet kontributi i dhënë përmes disa mekanizmave. Në varësi të natyrës së projektit, mundësitë që palët e interesuara të marrin pjesë në përgatitjen e SNRF-ve janë:

- pjesëmarrja në zhvillimin e pikëpamjeve si anëtar i BKS-së
- pjesëmarrja në grupet e punës
- paraqitja i një çështjeje përpara KIRFN-së (për më shumë hollësi, shih hapësirën në internet të BSNK-së)
- paraqitja e një letre me komente në përgjigje të një materiali për diskutim
- paraqitja e një letre me komente në përgjigje të një projekt-paraqitjeje
- paraqitja e një letre me komente në përgjigje të një projekt interpretimi
- pjesëmarrja në seancat publike dhe diskutimet në tryezat e rrumbullakëta
- pjesëmarrja në vizitat në terren.

BSNK publikon një raport vjetor për aktivitetet e veta të vitit të fundit dhe për prioritetet për vitin në vijim. Raporti ofron bazën dhe mundësinë që palët e interesuara të japin komentet e tyre.

Parathënia e Standardeve Ndërkombëtare të Raportimit Financiar

Parathënia e Standardeve Ndërkombëtare të Raportimit Financiar parashtrohet objektivat dhe procesin e rregullt të BSNK-së dhe shpjegon objektin, autoritetin dhe kohën e aplikimit të SNRF-ve (përfshirë interpretimet).

Kuadri i BSNK-së

BSNK ka një *Kuadër për përgatitjen dhe paraqitjen e pasqyrave financiare*. *Kuadri* e ndihmon BSNK-në:

- (a) të përgatisë SNRF-të e ardhshme dhe të shqyrtojë SNRF-të ekzistuese; dhe
- (b) të nxisë harmonizimin e rregulloreve, standardeve të kontabilitetit dhe procedurave në lidhje me paraqitjen e pasqyrave financiare, duke ofruar një bazë për pakësimin e numrit të trajtimeve kontabël alternative të lejuara në SNRF.

Krahas kësaj, *Kuadri* mund të ndihmojë:

- hartuesit e pasqyrave financiare për zbatimin e SNRF-ve dhe trajtimin e temave të cilat nuk janë ende në objektin e një standardi apo interpretimi
- audituesit për të formuar një opinion nëse janë apo jo pasqyrat financiare në përputhje me SNRF-të
- përdoruesit e pasqyrave financiare për të interpretuar informacionin që përmbajnë pasqyrat financiare të përgatitura në përputhje me SNRF-të
- personat e interesuar për punën e BSNK-së, duke u dhënë atyre informacionin për metodën që ndjek Bordin për përpilimin e standardeve të kontabilitetit.

Kuadri nuk është SNRF. Megjithatë, gjatë përgatitjes së një politike kontabël në mungesë të një standardi apo interpretimi i cili të zbatohet në mënyrë specifike për një zë të caktuar, i kërkohet drejtimit të një njësie ekonomike të mbështetët dhe të shikojë mundësinë e aplikimit të koncepteve që përmban *Kuadri* (shih SNK 8 *Politikat kontabël, ndryshimet në vlerësimet kontabël dhe gabimet*).

Në një numër të kufizuar rastesh, mund të ketë një përplasje midis *Kuadrit* dhe një kërkesë të një standardi ose interpretimi. Në rastet kur ka përplasje, duhet të zbatohen kërkesat e standardit ose interpretimit dhe jo ato të *Kuadrit*.

Standardet e kontabilitetit

BSNK i publikon standardet e veta në një seri dokumentesh të quajtur Standardet Ndërkombëtare të Raportimit Financiar (SNRF). Me të filluar ushtrimin e aktivitetit, BSNK aprovoi Standardet Ndërkombëtare të Kontabilitetit (SNK) të publikuar nga paraardhësi i vet, Komiteti i Standardeve Ndërkombëtare të Kontabilitetit. Termi “Standardet Ndërkombëtare të Raportimit Financiar” përfshin SNRF-të, SNK-të dhe Interpretimet e nxjerra nga Komiteti i Interpretimeve për Raportimin Financiar Ndërkombëtar (KIRFN), ish-Komiteti i Përhershëm për Interpretimet (KIS).

Trajtimi bazë dhe trajtimet alternative të lejuara

Në disa raste, SNRF-të lejojnë trajtime të ndryshme për transaksione dhe ngjarje të caktuara. Në disa raste të caktuara, njëri trajtim identifikohet si “trajtimi bazë” ndërsa tjetri si “trajtimi alternativ i lejuar”. Pasqyrat financiare të një njësie ekonomike mund të përshkruhen në mënyrë të përshtatshme si pasqyra të përgatitura në përputhje me SNRF-të, pavarësisht nëse kanë përdorur trajtimin bazë apo trajtimin alternativ të lejuar.

Objekti i BSNK-të është të kërkojë që transaksionet dhe ngjarjet e ngjashme të kontabilizohen dhe të raportohen në mënyrë të ngjashme, ndërsa transaksionet dhe ngjarjet jo të ngjashme të kontabilizohen dhe të raportohen në mënyrë të ndryshme, si brenda një njësie ekonomike nga njëra periudhë në tjetrën ashtu edhe mes njësisë ekonomike. Rrjedhimisht, BSNK synon të mos lejojë mundësi zgjedhjeje për sa i takon trajtimin kontabël. Po kështu, BSNK i ka marrë edhe një herë në shqyrtim, dhe do të vazhdojë t’i marrë përsëri në shqyrtim, ato transaksione dhe ngjarje për të cilat SNK-të lejojnë një mundësi zgjedhjeje për sa i takon trajtimin kontabël, me objektin pakësimin e numrit të këtyre mundësive të zgjedhjeje.

Këshillat e dhëna nga stafi

Në përgjithësi, Procedurat e Punës të BSNK-së nuk e lejojnë stafin e BSNK-së të japë këshilla në lidhje me kuptimin e SNRF-ve.

Aktivitetet teknike në zhvillim

Një informacion i hollësishëm për aktivitetet teknike në zhvillim të BSNK-së dhe KIRFN-së, si edhe për ecurinë e diskutimeve të BSNK-së dhe KIRFN-së, mund të gjendet në hapësirën në internet të BSNK-së. Me përfundimin e projekteve, BSNK pret të shtojë projekte të reja. KIRFN i shton tema të reja programit të vet të punës në bazë të një vlerësimi të çështjeve të paraqitura nga organet anëtare.

BSNK raporton për projektet e veta teknike në buletin e tij tremujor, *IASB Insight*, dhe në hapësirën e vet në internet. BSNK publikon një raport për vendimet e veta menjëherë pas çdo takimi të BSNK-së në organin *IASB Update*. KIRFN publikon një raport për vendimet e veta menjëherë pas çdo takimi të KIRFN-së në organin *IFRIC Update*.

Publikimet dhe përkthimet e Fondacionit të BSNK-së/KSNK-së

Fondacioni i KSNK-së ruan të drejtën e autorit për Standardet Ndërkombëtare të Raportimit Financiar, Standardet Ndërkombëtare të Kontabilitetit, Interpretimet, projekt-paraqitjet dhe publikimet e tjera të BSNK-së në të gjitha vendet, me përjashtim të rasteve kur Fondacioni i KSNK-së ka hequr dorë shprehimisht nga e drejta e autorit për pjesë të këtij materiali. Për më shumë informacion në lidhje me të drejtën e autorit të Fondacionit të KSNK-së, shihni njoftimin për të drejtën e autorit në këtë vëllim ose në hapësirën në internet të Fondacionit të KSNK-së.

Përkthimet e aprovuara të Standardeve Ndërkombëtare të Raportimit të Financiar janë në mbi 40 gjuhë, përfshirë të gjitha gjuhët kryesore të Evropës dhe Azisë. Fondacioni i KSNK-së do të shqyrtojë mundësinë e bërjes së përkthimeve të aprovuara edhe në gjuhë të tjera. Për më shumë informacion, kontaktoni Drejtorin e Operacioneve të Fondacionit të KSNK-së.

Edhe pse Fondacioni i KSNK-së bën të gjitha përpjekjet për t’i përkthyer në kohë SNRF-të në gjuhë të tjera, duhet ndjekur një proces rigoroz, për të siguruar që përkthimet të jenë sa më të sakta. Për këtë arsye, mund të ketë një kalim të kohës nga momenti kur publikohet (në anglisht) nga BSNK një standard ose një interpretim deri në momentin kur publikohet në gjuhë të tjera. Mund të gjeni më shumë informacion në hapësirën në internet të BSNK-së (www.iasb.org) dhe në Drejtorinë e Publikimeve të Fondacionit të KSNK-së.

Për më shumë informacion

Në hapësirën në internet të BSNK-së, me adresë www.iasb.org, mund të gjeni të reja, përditësime dhe burime të tjera në lidhje me BSNK-në dhe Fondacionin e KSNK-së. Në Dyqanin e Fondacionit të KSNK-së, në adresën www.iasb.org, mund të porositni edhe shërbime të abonimit dhe publikimet më të fundit.

Për më shumë informacion për BSNK-në, apo për të marrë kopje të publikimeve dhe informacion për shërbimet e abonimit të Fondacionit të KSNK-së, vizitoni hapësirën në internet të BSNK-së, me adresë www.iasb.org, ose dërgoni një letër në adresën:

IASC Foundation Publications Department

30 Cannon Street,

London EC4M 6XH

United Kingdom

Telefon: +44 (0)20 7332 2730

Faks: +44 (0)20 7332 2749

Postë elektronike: publications@iasb.org

Hapësira në internet: www.iasb.org

